

Mattup ere ki poone Pool yi riiŋe a doŋ a Tessaloni

*Enj urzi k'ono doŋ kun t'oone adda mattup
ettiyo*

Ette mattup ere ki poone Pool yi riiŋe a doŋ i ziipe addaŋ a Isa a geeger Tessaloni. Tessaloni tod'te geeger ki siido Girek, a biza bar ki Mediterane. Pool geŋ ti lanjayí Silas ti poone an iide ki Tessaloni me, an an di gizite Rabila Majjaanawa k'Isa Almasi. Doŋ baadaŋ a Tessaloni geŋ an d'umbe urzi k'Almasi. Wo de k'ita maŋ doŋ miibi ti diine Yawudiyagi an iide'ŋ an an t'eelite ono a kane doŋ Tessaloni, kono an di-tooge k'ollige k'ono Pool ti Silas me. (Naabo doŋ zina 17.1-10)

San maŋ Pool y'a igibe Timote y'a ti'n wollo zemba ki Tessaloni geŋ, lekkiyadaŋ mummino koo maŋ? Aame Timote y'iide wo yi-gime maŋ, yi di t'iide taaya a Pool y'ede, an seedu daayum zakidi a urzi k'Isa me, wo de doŋ ongoŋ ti diinayaŋ an di-toogiyo ki naabo k'ombo bizaŋ me. Wo kane an'de, kama k'Isa goppon an niiba maŋ, a t'isa ki bita. Wo doŋ ongoŋ eedaŋ a digge kono maawaŋ ti lanziyagaŋ baadaŋ an t'inda, wo Isa yi ki kama ye botto. Kono kamo Pool y'an di riiŋe mattup kono an t'eele toogo, wo y'an di ruute soŋ mummino me kama k'Almasi t'isa me.

Toose ki Pool

¹ Mattup ette i raaniya nuɗ Pool ti Silas wo Timote, a kune ɗoɗ ogiyso ti suma k'Isa a geeger Tessaloni, kune ɗoɗ ki Meega Raa wo ki Galmeega Isa Almasi. Geɗ beeko ti toose ki Raa i koonaa eggun.

Lekkiyo wo zaapu k'adde a Isa ki ɗoɗ Tessaloni

² Adda tonɗiyo Raa ere kaye ay tonɗiyo gette, daayum ay rootiyo koduwo a Raa kono kune pay wo sundugun ay gi-di sedɗiyo ye.

³ Adda tonɗiyadey a ɗaana Meegin Raa gette, kaye'ɗ ay elkiyo daayum a kune, a naabagun ere a urzi zaapu k'addugun a Isa, a lekkiyagun ere kun geyyiso Raa t'adde soo, wo a zaapu k'elkisagun a Galmeegin Isa Almasi ere kun seedu zakidɗi bini ɗangu.

⁴ Zemba ki nuɗ, kaye ay suune Raa y'unni giyye, y'unni biire kun t'ize ɗoɗ ki yode.

⁵ Munda geɗ ay yi suune kono Rabila Majjaanawa k'Isa ere ay un gizite gette, tod' t'iina di kune t'urzi k'ono ɗoɗ uɗɗe ti bizey ɗanɗal ye, wo soɗ ti toogo ti noogiyo k'Unde Kamilen, wo ay zuune adda k'addey ono ɗoɗ ay gizite geɗ kane ɗerec. Inkiino kun suune lekkiyo ere kaye ay likke a diine kune gette, tod'te un d'ize beehiye a kune.

⁶ Kune kun t'ize ɗoɗ umbe zina kaye wo ki Galmeega. Adda dabar baadan toɗ ono Raa kun di'n ziida t'unɗuwo ere ettiyo t'urzi k'Unde Kamilen*.

* **1:6 1.6** Kun wollo adda mattup ki Naabo ɗoɗ zina 17.4-9.

⁷ Injino maŋ kune lekkiyaguŋ ti konso aa urzi a kane dŋoŋ pay i ziipe addaŋ a Isa a siido Maseduwan ti Akayi geŋ, an di wolle an d'ozire eego.

⁸ Ono Galmeega geŋ ti di kune i-tiipe adda siido Maseduwan ti Akayi danŋal ye, wo soŋ rabila ere a urzi zaapu k'adduguŋ a Raa gette i-tiipe a ume tuuku toŋ maŋ, injino i ki dehu ay ki roote munda ye baa a urzi zaapu k'adduguŋ me.

⁹ Duwo pay an tŋwwo taaya a tukki kaye an'de, mummino a ettiyadey ere di kune gette kun ayni ziiida me, wo mummino kun di-gime ki tukki Raa me. Urzi loŋgayi kun d'iili, kun di daaniya Raa ki kotto zeere kono kun i di naabe,

¹⁰ wo kun di delle Ulí Isa y'a kimo ti kandaane. Yo Ulo geŋ Raa y'a ti y' bilde ti diine dŋoŋ unto, wo yoŋ y'in di'n utta ti booro Raa ere aana.

2

Naabo ki Pool a geeger Tessaloni

¹ Zemba ki nuŋ, kune batum kun suune beehiye ettiyadey di kune gette ki bita ye.

² Soŋ kun suune ki poone ay d'aaney di kune geŋ, adda geeger ki Pilip gette an ay di'n dibire wo an ay di'n gildite. Wo de saŋ Raa y'ay d'eele toogo ay un di gizite daa k'orgiso urzi Rabila Majjaanawa adda dabar ere baadaŋ gettiyo toŋ maŋ*.

³ Rabila Majjaanawa ere ay kazita a duwo ette, tod'te ita k'ono dŋoŋ butte ye, elkisadey oldo

* [2:2](#) [2.2](#) Kun wollo adda mattup ki Naabo dŋoŋ zina [16.19-24](#); [17.1-9](#).

ye, wo ay ki dehu ɗuwo ay gi di'n mabilɗe ti metiŋko ye.

⁴ Wo ɗe ki kotto maŋ, kaye Raa y'ay ti'n niime, y'ay di'n wulle ɗoŋ aane i-t'ise naabadí, maŋ y'ay d'ele a beezey naabo ay di kizite Rabila Majjaanawa. Anken ono ɗoŋ ay kazita eŋ, ay k'okkime onamey kono ɗuwo ulbaŋ an ki d'ise unse ɗo ye, wo ɗe ay kazita kono ulbe i-d'ise unse a Raa, yode wede i suune ono k'addey.

⁵ Geŋ inŋino kun suune beehiye, piɗipiɗiŋ kaye ono ɗoŋ ki mabilsa ɗuwo ulbaŋ an d'ise unse ay ki gizite ye, piɗipiɗiŋ t'urzi k'onamey ay ki dihe ye ay t'oone munda ti beyguŋ me, ono ɗoŋ ay rootiyo eŋ Raa toŋ yi woliyo wo y'ollige.

⁶ Kaye ay ize inŋino kono ay ki dehu wenda y'ay gi di'n t'imme ye, ise kune, ise wede doolo toŋ maŋ.

⁷ Ki too maŋ kaye ɗoŋ zina k'Almasi geŋ, ay d'ede urzi ay un di'n dokke ki toogo. Wo ɗe kaye a diinaguŋ geŋ, ay ti t'isse tuddey poyoyo aakede erewo ti boohiyo inŋitú a gulbatú.

⁸ Kaye ay unni giyye baadaŋ geŋ, ay di dihe ay un kizite Rabila Majjaanawa ki Raa ɗaŋŋal ye, wo ɗe ise k'unto toŋ ay di-t'inda kono kune me. Derec, geyyisadey a tukki kune gette baadaŋ a jiiire!

⁹ Zemba ki nuŋ, kun suune naabo ere ay y'iidi yeebadey diɗɗo onnu ay d'urme gette, kono ay ki dehu a wenda soo toŋ ti diinaguŋ ay yi-ki t'ele attidi ye, wo geŋ inŋino ay un gizite Rabila Majjaanawa ki Raa te.

¹⁰ Kune kun wulle wo Raa toŋ yi wulle, sooruzey a ɗaana kune ɗoŋ i ziipe adduguŋ a

Isa gette tod'te kamilen, ki diine wo wenda yi k'ambe sundey k'ulsuko ye.

¹¹ Wo kun suune, aame kaye a diinagun gen, ay likke ti wede tuuku ton aa lekkiyo meege t'innizi.

¹² Kaye ay un d'eele kooke, kun d'uune toogo wo ay di gid'dima ay un ti'n ziipe urzi kono kun di lekke lekkiyo ere aa Raa yi dehu, yon y'unni waaku kun di lekkey adda daryika ki Mozikadi.

¹³ Kaye daayum ay roote koduwo a Raa ki munda soo sey: Aame ay un gizite ono Raa gen, kun d'illiga wo kun d'umbe, kun k'ilke ye en ono don tudde me, wo de kun ilke'n kane ono Raa derec. Kane ono gen an di naabiya adda k'adde kune don i ziipe addugun a Isa.

¹⁴ Gen zamba ki nun, kune kun diine ita don ki Raa ogiysito ti suma k'Isa a siido Ziide, kane an lekkiyo kettiyo kan soo t'Isa Almasi. Kune'n don siidagun batum an un di'n dibire, aakede Yawudiyagi an dibire don ki Raa ogiysito ti suma k'Isa a siido Ziide†.

¹⁵ Kane Yawudiyagi genno batum ide Galmeega Isa ti nebiyagi me, wo kaye ton an ay di'n dibire‡. Raa gen ulbi i-k'isiyo unse ye ti kane me, kane adu ki duwo pay.

¹⁶ Kane an ay t'eegirso ay di kizite a kane don Yawudiyagi ye ono don an t'oone uttiyo me. An isiyo inkino gen, an a-ti kummiyo oldikadan ekk'oldiko maawan ere daayum an ize, wo de

† **2:14 2.14** Kun wollo adda mattup ki Naabo don zina 17.5-6.

‡ **2:15 2.15** Kun wollo adda mattup ki Naabo don zina 9.23,29; 13.45,50; 14.2,5,19; 17.5,13; 18.12.

kane geŋ an a-ti dɪŋge ti kulkuwo Raa a eedaŋ§.

Pool yi dehu y'a kime ki Tessaloni

¹⁷ Zembɔ ki nuŋ, aŋken kaye ay ti lidɔo ti tuddugun k'onniyto miibi, d'erec ki tudde kine dokki wo biza k'ulbin kan soo. Kaye ay d'ede mosogo baadaŋ ki kune, ay dehutu urzi ay d'ette ay un ti'n wollo sey.

¹⁸ Kono kamo ay dehu ay di kime di kune, wo nuŋ Pool eŋ n'a dihe taŋ baadaŋ n'a ette, wo de Meeda siitandani t'ay t'iigire.

¹⁹ A kama ki Galmeegin Isa Almasi geŋ, ki kotto zaapu k'elkisadey, unswadey wo kaɗumul ay kiley tuddey tin kune a ɗaanadi me.

²⁰ Eyye, t'urzi kune ay t'oona tamma, wo ulbey aasa unse.

3

Agisa Timote ki Tessaloni

¹ Kaye ay ki d'iine ombine ye daa k'ollige rabilagun me. Inkinu man ay d'ilke, beehiye ay di lekke siidey a geeger k'Aten* te.

² Wo kaye ay un d'igibe leemadey Timote, yon wede yi naabiya ki Raa ti kaye kan soo a urzi kazita Rabila Majjaanawa k'Almasi. Ay un y'igibe kono y'un t'eeley kooke wo kun t'ooney toogo a urzi zaapu k'addugun a Isa me.

³ Inkinu man ti diinagun wenda soo ton yi t'ooro ye ti dabar ere ankenno ette, kono kune

§ **2:16 2.16 Kulkuwo Raa a eedaŋ:** Kun wollo adda mattup ki Romen 11.1-12, ume wede Pool yi rootiyo yi zuune adda k'addi zembadi Yawudiyagi geŋ Raa y'an utta. * **3:1 3.1** Kun wollo adda mattup ki Naabo don zina 17.15-16.

batum kun suune beehiye, dabar gette a-t'ette a munda wede Raa yi dehu y'aase a tukki kine.

⁴ Aame kaye di kune geŋ ay un di ruute ki poone, ay'de: «Kine in t'oonaa dabar baadaŋ.» Wo geŋ inŋino kun suune, dabar gette t'a iina.

⁵ Kono kamo ni k'iine ombiŋe ye n'a delle me, inŋino n'a t'igibe Timote y'a seŋdo mekk'ono a urzi zaapu k'addugun a Isa. N'ize inŋino n'orgiso, koo Meeda siitandani t'unni naamey daggiya koo maŋ, geŋ oodiibe yeebadey a urzi kazita k'ono Raa di kune gette a ki t'ise ki bita ye.

Kooke a nuuge foŋ Tessaloni

⁶ Wo de ankeŋ Timote ti di kune yi-gimo†, y'ay d'iido ti rabila majjaanawa a urzi zaapu k'addugun a Isa ti geyyiso ere un d'ede a diinagun te. Yoŋ y'ay ruute kune toŋ kun elkiyo daayum a kaye me, kun dehu kun ay ti'n wolle sey aa kaye toŋ ay dehu ay un ti'n wolle kay.

⁷ Inŋino maŋ zemba ki nuŋ, adda k'ulbe k'oodiyo baadaŋ ti dabar ere a eedey gette, kaye ay d'uune toogo t'urzi zaapu k'addugun a Isa geŋ me.

⁸ Wo ankeŋ kaye toŋ addey i t'udige, kono kun seedu zakidi a urzi lekkiyo kettiyo kaŋ soo ti Galmeega me.

⁹ Kune a daana Raa addey kun ay ti'n uune t'unŋsuwo, wo kono kune geŋ ay di roote koduwo a Raa kaŋ mummino toŋ ay ki suune ye.

† **3:6 3.6** Kun wollo adda mattup ki Naabo foŋ zina 18.5: Pool yi riine mattup ette aame yoŋ a geeger ki Korent.

¹⁰ Didɗo, onnu ay kodɗime tonɗiyo Raa kono y'ay di t'ihina urzi ay d'ette ay un ti'n wollo sey, wo munda wede a biite a urzi zaapu k'addugun a Isa geɗ ay un ti y' d'angey.

¹¹ Inkinno kaye ay tonɗiyo Meegin Raa batum ti Galmeegin Isa, an ay di-t'ihina urzi wede ay d'etta di kune.

¹² Wo soɗ geyyiso ere un d'ede ti tuddugun wo ki don pay gette, Galmeega y'un t'aagal k'aagulu, tod'te aakede geyyiso ere kaye batum ay d'ede a tukki kune.

¹³ Geɗ Galmeega y'un elo toogo a biza k'ulbugun, inkinno a onniyo ere Galmeegin Isa y'aana ti donzi pay gette, kune a daana Meegin Raa ooyiso kese a yode, wenda y'a ki roota k'ulsuko a tukki kune ye baa.

4

Lekkiyo ere aa Raa yi dehu

¹ Inkinno ki d'angu zamba ki nun, kune'η an unni duuye mummino kun di lekke a urzi wede Raa ulbi i-d'ise unse me, wo d'erec kun sooru miɗ a urzutú. Wo de ankenno ay un obe bey wo ay un d'eelo kooke a munda wede kun d'ise ti suma Galmeega Isa, geɗ lekkiyagun gette un d'odo t'inkinno.

² Kune kun'ni suune ono don ay un ruute, kane geɗ Galmeega Isa y'a ruute.

³ Enno munda wede Raa yi dehu me: Kun lekko don ooyiso kese a Raa, kun ooli tuddugun a urzi boliyo ye.

4 Wede tuuku toŋ ti diinaguŋ yi suuno seedu tuddi*, y'a lekko ooyiso kese a Raa wo duwo an i di t'ele suma.

5 Y'a k'ooli tuddi ki ŋaapu a suldi doŋ ulpi tudde ti dehu geŋŋo ye, aakede doŋ i ki suune Raa soo daŋŋal ye ge d'isiyo.

6 A urzi suldi geŋ, wede tuuku toŋ yi isa ulsu a leemadi ye wo yi ti y' mabilɔfa yi deha eddi ye, ise erewo toŋ iŋkino. A wede y'isiyo iŋkino geŋ i-ti dooza Galmeega ti siidi, ono eŋ ay un ti'n ruute wo ay un ti'n doolo sey.

7 Kine Raa y'inni wiike in gi di lekke a urzi pitinŋko dehu tudde ye, wo de y'inni wiike in di lekke doŋ ooyiso kese a yode.

8 Kono kamo, wede y'a ti doopide a suldi doŋ ay un ruute kun d'ise geŋŋo maŋ, yi koogire wedusu ye, yi koogire Raa wede un ele Unde Kamileŋ.

9 A urzi geyyiso tudde aakede zemba geŋ, i k'ise ye baa ay un di raaje sey me, kono kune batum Raa y'un ti'n duuye a urzi geyyiso tudduguŋ me.

10 Geyyiso tin, tod'te ere un d'ede a tukki zemba doŋ pay i ziipe addaŋ a Isa a siido Maseduwan pay gettiyo. Wo de zemba ki nuŋ, kaye ay un t'ele kooke ay t'eese un d'odo t'iŋkino.

* **4:4 4.4 Tuddi:** Ono doŋ i rootiyo «tuddi» geŋ, t'ono Girek «umpo». Ono doŋ Pool yi ruute «umpo» geŋ, doŋ oŋgoŋ an elkiyo i-kaza «tudde», wo doŋ soŋ an elkiyo i-kaza «erewo». Iŋkino maŋ kane doŋ elkiyo «erowo» geŋ an di riije, an'de: «Wede tuuku toŋ ti diinaguŋ yi suuno beeriyo k'erewo, an di lekko ooyiso kese a Raa geŋ duwo an an t'ele suma.»

¹¹ Kun deho lekkiyo ere ti toose ti d'uwu, kun wollo naabagun, wo k'ombagun kun naabo ti beygun, geŋ kun iso aakede ay un ruute kun d'ise.

¹² Kun iza inkinu maŋ, lekkiyagun t'a koonu beehiye a d'aana doŋ i ki ziipe addaŋ a Isa ye me, wo kune toŋ kun ki tonda munda ti bey wenda ye.

Baldiya ki doŋ i t'inda

¹³ Zamba ki nuŋ, ay dehu ay un di roote a urzi doŋ i t'inda, kono kun ki-t'ise sommagi dondon ye, aakede doŋ i ki zaapu elkisadaŋ a Isa ye.

¹⁴ Derec, kine in umbe Isa y'inda wo yi bilde ti diine doŋ unto. Geŋ inkinu kay kane doŋ i ziipe addaŋ a Isa wo an t'inda geŋ, Raa y'a ti'n balda wo y'a ti'n t'okkiya kaŋ soo t'Isa a sirpadí.

¹⁵ Kun ollo, ay un rootiyo eŋ ono Galmeega yi ruute: Onniyo ere Galmeega yi kimo gette, kine doŋ i ziipe addiŋ a Isa i lekkiyo zeere botto geŋ, in k'ooguma ye ki d'aana kane doŋ i ziipe addaŋ a Isa i t'inda me.

¹⁶ Aame geŋ d'uwu an d'olliga d'olle, tod'te golla ki goole maaleekiyagi yi baahu parre Raa. Inkinu yode Galmeega Isa batum y'a d'eege ti kandaane. Wo kane doŋ i ziipe addaŋ a Almasi wo i t'inda geŋ, an di-balda ki poone.

¹⁷ Saŋ maŋ, kine doŋ i lekkiyo zeere botto geŋ, in d'eŋgila k'awwa ti kane kaŋ soo ekki dondari, k'okkime Galmeega a kandaane. Geŋ inkinu, in di lekkey ti Galmeega ki daayum.

¹⁸ Inkinu maŋ kun elo kooke ti tuddugun t'urzi dooyiso ette.

5

Onniyo kama Galmeega

¹ Zemb̄a ki nuŋ, i k'ise ye ay un di raan̄e a urzi k'onniyo, ise a urzi peedo ere suldi pay geŋ an d'aana me.

² Kune batum kun suune adda k'addugun̄: Onniyo ere ki Galmeega y'a kimo gette, t'aana aa wede k'oogire y'ettiyo a diddo, wenda soo toŋ umbo a suuna me.

³ Aame duwo an iisa rootiso: «Ankenno kine adda toose, munda k'orgiso umbo baa» man̄, in̄kino a kaamiki geŋ miŋ dabar baadan̄ t'a deega eedan̄. Geŋ dabar gette t'aana a kaamiki, aakede kakkisa k'erewo addutu i t'umbe k'ehiyo, wenda soo toŋ umbo a t'alda me.

⁴ Wo de zemb̄a ki nuŋ, kune adda zimolo ye kono onniyo gette t'un di'n kiira sutte aa wede k'oogire me.

⁵ Kune doŋ ki toore Raa, lekkiyagun̄ aa a onnu. Kine ki diddo ye, ki zimolo ye.

⁶ In̄kino man̄ in t'udige ye aa kane doŋ ongo me, wo de in lekko zeere, tuddin̄ in ti soodo.

⁷ Kane doŋ i moone geŋ an moone a diddo, wo doŋ i sobo toote i ceeriyo eedan̄ geŋ an sobo a diddo*.

⁸ Wo de kine doŋ lekkiyadin̄ aa a onnu geŋ, tuddin̄ in ti soodo. In lekko a urzi zaapu k'addin̄ a Isa wo ti geyyiso tuddin̄, kane geŋ a kine aakede asigursu yi t'usse saapa. Wo in

* **5:7 5.7 An sobo a diddo:** Ti kaaga geŋ a siido Gires kane doŋ Yawudiyagi ye an sobo toote a diddo, wo di kine in̄kino ye, doŋ an sobo a onnu wo a diddo pay.

zaapo elkisadiŋ a Raa wede yi'n utte kono zaapu k'elkiso gette, tod'te aakede asigursu yi t'usse kakkile maala.

⁹ Kine Raa yi dihe y'inni wiike toc miŋ y'a ki d'ekka booro eediŋ ye, wo de y'inni wiike kono in t'ooney uttiyo t'urzi Galmeegiŋ Isa Almasi.

¹⁰ Isa y'inda kono kine, iŋkino a kamadí gette ise kine in lekkiyo zeere, ise in t'inda toŋ maŋ, in lekkiyo kettiyo kaŋ soo ti yode.

¹¹ Iŋkino maŋ kun elo kooke wo kun noogo tuddugun kono kun di t'ihira a urzi zaapu k'addugun a Isa, wo ni suune naabo gette kun isiyo too.

Toose ti kooke wede ki d'angu

¹² Zemba ki nuŋ, ay un di roote'ŋ, kun an ottilo a d'oŋ oodfibe yeebadan a naabo ere a diinagun, kane d'oŋ Galmeega y'an ele urzi an un di'n dokkiyo wo an un di'n aapudu geŋ me.

¹³ Kono naabo ere an isiyo a kune gette, kun an ottilo baadan wo kun'ni geyyo. Kun lekko ti toose ti tuddugun.

¹⁴ Zemba ki nuŋ, ay un t'eele kooke, ay t'eele'ŋ: Doŋ golguwo kun aapan, d'oŋ an d'ede orgiso addan kun an eelo kooke, kun noogo d'oŋ weedayan umbo wo kun lekko t'ombiŋe ti d'uwu pay.

¹⁵ Kun koonaa mentikagi, wenda soo toŋ a bakadí yi-kima ulsuko t'ulsuko ye, wo kun deho daayum isiyo behiyko ti tuddugun wo ti d'uwu pay.

¹⁶ Kun lekko daayum t'unŋsuwo,

¹⁷ kun tondo Raa daa puukiyo,

¹⁸ aame ize munda tuuku toŋ maŋ, kun rooto koduwo a Raa. Geŋŋo suldi dŋoŋ Raa yi dehu kun d'ise a urzi lekkiyaguŋ ere kettiyo kaŋ soo t'Isa Almasi te.

¹⁹ Kun i t'eegire ye a naabo k'Unde Kamileŋ te.

²⁰ Kun'ni kiigira ye ono dŋoŋ Raa y'agisa zemba an un di rootiyo geŋ me,

²¹ wo de ono geŋ kun ti'n wollo pay: Doŋ beehiye kun di zaapo adduguŋ,

²² wo kun ti led'fo t'ita suldi dŋoŋ ulpi tuuku toŋ maŋ.

²³ Geŋ Raa wede i d'eliyo toose geŋ, yode batum y'un ti'n iso dŋoŋ ooyiso kese a yode a urzi lekkiyaguŋ ere pay gette, y'unni booho pay, yi booho tudduguŋ, unduguŋ, wo biza k'ulbuguŋ. Injino maŋ a onniyo ere Galmeegiŋ Isa Almasi yi kimo gette, wenda y'a ki roota k'ulsuko a tukki kune ye baa.

²⁴ Raa wede unni waaku geŋ, yoŋ yi seedu zakidi a munda wede yi rootiyo y'aasa me, geŋ yi t'isa suldi geŋ me.

²⁵ Zemba ki nuŋ, kun tondo Raa kay kono kaye me.

²⁶ A zemba pay kun an t'iso toose kaŋ bey sire sire aa zemba.

²⁷ Wo aŋkeŋ kun ollo, n'un di rooto ti suma Galmeega, mattup ette kun an ti-garoy a zemba pay.

²⁸ Geŋ beeko ki Galmeegiŋ Isa Almasi ti koono egguŋ.

**Mattup ki Taasuwa ere Aware
Mukulu: Mattup ki Taasuwa ere Aware (New
Testament)**

copyright © 2019 Wycliffe Bible Translators, Inc.

Language: Guerguiko (Mukulu)

Contributor: Wycliffe Bible Translators, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source
files dated 14 May 2025

523c1c0a-f8ac-5d2f-aebe-7063b0de6b23